

**DAP gesa Najib campur tangan isu "Red Bean Army"**  
**Malaysian Insider**  
**July 4 , 2013**  
**Oleh Hasbullah Awang Chik**

DAP menafikan Hotel Concorde dan bangunan Komtar di Pulau Pinang sebagai markas tentera sibernya (Red Bean Army) seperti didakwa oleh Barisan Nasional (BN).

Ahli Parlimen Petaling Jaya Utara, Tony Pua menggesa Datuk Seri Najib Razak campur tangan supaya isu tentera siber ini dihentikan segera demi merealisasikan pendamaian nasional yang dipromosikan perdana menteri itu.

"Hari ini kami memanggil pihak media bagi melihat sendiri markas siber yang digembar-gemburkan oleh BN," kata Pua dalam satu sidang media di Hotel Concorde, Kuala Lumpur malam tadi.

"Saya menyeru Perdana Menteri, Datuk Seri Najib Razak supaya segera menghentikan tuduhan tidak berasas ini yang kini menjadi bahan jenaka akhbar Umno, Utusan Malaysia," katanya.

Penasihat DAP, Lim Kit Siang pula berkata ini adalah satu taktik kotor yang dimainkan oleh musuh politik mereka dan mempersoalkan mengapa polis sendiri tidak menjalankan siasatan di hotel itu.

"Kami tidak membelanjakan walau satu sen pun untuk membangunkan tentera siber ini malah BN sendiri yang menggunakan khidmat tentera siber bagi memenangi PRU13," kata Lim merujuk kepada pilihan raya umum ke 13.

"Ketua Polis Negara, Tan Sri Khalid Abu Bakar harus menjawab mengapa polis masih berdiam diri terhadap isu ini," katanya.

Ahli Parlimen Gelang Patah itu menuntut satu Suruhanjaya Siasatan Diraja (RCI) ditubuhkan untuk menyiasat dakwaan akhbar milik Umno, Utusan Malaysia itu.

Ahli Parlimen Bandar Kuching, Chong Chieng Jen yang turut hadir pada sidang media itu berkata BN harus menerima hakikat mereka hilang kepercayaan rakyat dalam pilihan raya lalu kerana rakyat Malaysia hari ini lebih bergantung kepada media sosial.

katanya, tentera siber BN lebih gemar menyebarkan fitnah dan berdiri atas nama wang tetapi penyokong Pakatan Rakyat (PR) memberi komen berdasarkan fakta dan semangat cintakan negara demi melihat perubahan dalam pemerintahan.

Selepas PRU13 Utusan Malaysia terus menerus mendakwa DAP mempunyai tentera siber yang digelar "Red Bean Army" yang diupah untuk menyerang BN di alam siber. Sehingga kini, masih belum ada pembuktian kukuh untuk menyokong dakwaan itu – 4 Julai, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/dap-gesa-najib-campur-tangani-isu-red-bean-army/>

